

明·薛鎧撰
崇禎沈猶龍閩中刊本

保嬰全書
(二)

新文豐出版公司印行

景白中央圖書館珍藏善本書籍

明薛鎧撰 崇禎沈猶龍閩中刊本

保 嬰 全 書 (二)

新文豐出版公司 印行



保嬰全書卷之六



贈太醫院院使薛鎰

編集

前太醫院院使男薛已治驗

發熱症

小兒之熱有心肝脾肺腎五臟之不同虛實
溫壯四者之不一及表裏血氣陰陽浮陷與
夫風濕痰食各當詳之心熱者額上先赤心
煩心痛掌中熱而噦或壯熱飲水已午時益

甚肝熱者左頰先赤便難轉筋尋衣捻物多
怒多驚四肢困倦寅卯時益甚脾熱者鼻上
先赤怠惰嗜卧身熱飲水過夜益甚肺熱者
右頰先赤手掐眉目喘咳寒熱飲水日西熱
甚腎熱者頰下先赤兩足熱甚骨蒸如虫
蝕熱甚不能起於牀夜間益甚仍當辨其虛
實實則面赤氣粗口燥唇腫作渴飲冷大小
便難或掀衣露體煩啼暴叫伸體而卧睡不

露睛手足指熱宜用表下虛則面色青白恍惚神緩口中虛冷噓氣軟弱喜熱惡寒泄瀉多尿或乍涼乍溫怫鬱驚惕上盛下泄夜則虛汗屈體而卧睡而露睛手足指冷宜用調補壯熱者肢體大熱熱不已則發驚癰溫熱者肢體微熱熱不已則發驚搐陰虛則內熱陽盛則外熱以手輕捫之則熱重按之不熱此皮毛血脉之熱熱在表也重按之筋骨之

分則熱輕手則不熱此筋骨之熱熱在裏也
不輕不重按之而熱此肌肉之熱熱在表裏
之間也以虛實分屬表裏而言之壯熱惡風
寒為元氣不充表之虛熱也壯熱不惡風寒
為外邪所客表之實熱也壯熱飲湯為津液
短少裏之虛熱也壯熱飲水為內火銷爍裏
之實熱也若夫內外皆熱則喘而渴口乾煩
燥腹滿四肢熱逢風寒如炙於火能冬不能

夏是皆陽盛陰虛也脉尺寸俱滿為重實尺寸俱弱為重虛脉洪大或緩而滑或數而鼓此熱盛拒陰雖形症似寒實非寒也熱而脉數按之不鼓此寒盛格陽雖形症似熱實非熱也發熱惡熱大渴不止煩躁肌熱不欲近衣其脉洪大按之無力或兼目痛鼻乾者此血虛發躁也當補其血如不能食而熱自汗者氣虛也當補其氣仲景論內外不足發熱

自汗之症禁不可發汗如飲食勞役雖病發熱誤發其汗則表必虛也身熱而汗出者風也發熱身疼而身重黃者濕也增寒發熱惡風自汗脉浮胃痞者痰也發熱頭痛脉數者食也寸口脉微為陽不足陰氣上入陽中則惡寒尺脉弱為陰不足陽氣下入陰中則發熱陰陽不歸其分則寒熱交爭也晝則安靜夜則發熱煩躁是陽氣下陷入陰中也晝則

發熱煩躁夜則安靜是重陽無陰也當亟瀉
其陽峻補其陰至若身熱脉弦數戰慄而不
惡寒者瘧癰也發熱惡寒脉浮數者溫病也
若四肢發熱口舌咽乾是火熱乘土位濕熱
相合故煩躁悶亂也若身體沉重走注疼痛
乃濕熱相搏風熱鬱而不得伸也心熱則用
瀉心湯導赤散安神丸肝熱則用瀉清丸柴
胡飲子脾熱則用瀉黃散肺熱輕則用瀉白

散重則用涼膈散及地骨皮散腎熱則用滋
腎丸實熱則宜疎下虛熱則宜調補壯熱者
導赤散溫熱者瀉黃散若肢體熱輕則用惺
惺散重則用羌活散之類大便秘者二黃犀
角散餘熱不退者地骨皮散骨節疼痛者梔
子仁湯宿滯內作者紫霜丸肝火內熱者龍
膽草湯陰盛隔陽而熱者人參理中湯肝經
血虛生風而搐者用四物天麻鈞藤鈞若熱

蘊便秘者四順清涼飲熱而二便調和風邪
蘊結於表而發者用惺惺散加麻黃汗之汗
後血虛而熱益甚者六神散加粳米汗後氣
虛而惡寒發熱者補中益氣湯汗後陰虛陽
無所附而熱者用四物湯加參耆汗後陽虛
陰無所附而熱者用四君湯加芎歸嬰兒諸
熱其因別症而作者當從所重而治之或乳
母七情厚味飲食停積遺熱於兒或兒嗜食

耳肥衣衾過煖或頻浴熱湯積熱於內為患者各當詳之蓋小兒臟腑脆弱元氣易虛補泄宜用輕和之劑庶無變症若乳下嬰兒當兼治其母仍參諸熱症治之

治驗

一小兒夜間發熱天明如故或小腹作痛飲食少思面色痿黃熱時面赤不時飲湯此食積所致用下積丸治之而消又用白

木散調理而安

一小兒飲食停滯腹痛作嘔用大安丸而
愈飲食雖進其腹仍痛用六君山查神麴
痛少止余以為脾氣傷而飲食難化乃去
前二味服六君子四劑而愈後又傷食仍
服前藥痛止而至暮發熱用六君柴胡升
麻而痊此由脾虛下陷不能升發故至暮
發熱也

一小兒發熱飲食少思大便不實常服蘆
薈等丸視其鼻赤此寒涼之劑復傷脾土
而虛熱也用五味異功散數劑而愈

一小兒十三歲內熱晡熱形體倦怠食少
作渴此稟賦怯弱之虛熱也用地黃丸異
功散補之不越月而痊

一小兒十四歲而近女色發熱吐痰至有
室兩目羞明頭覺脹大用地黃丸料加五

味子當歸黃芪煎服及補中益氣湯得慎疾而瘥

一小兒十四歲肢體倦怠發熱晡熱口乾作渴吐痰如湧小便淋瀝或面目赤色身不欲衣此稟腎不足而虛熱也用補中益氣湯六味地黃丸尋愈

一小兒五歲發熱作渴右頤鼻準微赤或與冷水涼藥即時嘔吐余曰右頤微赤肺

經虛熱也鼻準微赤胃經虛熱也先用四
君升麻一劑吐止又用白朮散二劑而不
渴更用四君子湯四劑而安

一小兒九歲發熱作渴用瀉黃散大便重
墜口角流涎彼欲瀉火余曰鼻準青白脾
胃虛寒肝木所侮也口角流涎胃氣不能
攝也大便重墜脾氣不能升也不信竟服
涼藥眉唇微動四肢微搐復來治余曰此

虛極而變慢脾風矣用六君炮薑當歸木
香釣藤鈎二劑益甚欲求更劑余曰藥力
未及耳又加炮附子一片即安後去附子
二劑而愈

一小兒四歲停滯腹痛發熱用大安丸而
飲食進又用六君山查神麴四劑而痛止
復傷食至暮復熱用六君柴胡山梔升麻
而痊此脾虛兼肝火之治法也